


Director interino di DIP sospechoso den caso Moringa

Ayera a bira conoci cu director interino di Departamento di Infraestructura y Planificacion (DIP) a ta sospechoso di a comete soborno y abuso di su funcion, y cu e caso den cual e ta involucra tin e nomber di Moringa.

Maske informacion durante dia a circula riba rednan social indicando cu a detene e director interino, Marilyn D., vocero di Ministerio Publico, Ann Angela a desmenti esaki na noticiero online NoticiaCla. Sinembargo, a confirma cu D. Ta sospechoso di soborno y abuso di su funcion, relaciona posiblemente cu dunamento di tereno.

Tambe a keda confirma cu Landsrecherche a bishita D. Ayera mainta na su residencia, unda tuma varios articulo di informacion tecnologico, manera laptop y telefon, den beslag.

Ken ta e sospechoso, Marilyn D.? D. a traha como asesor den Ministerio di Infraestructura, Desaroyo Teritorial y Medio Ambiente di juni 2018 te januari 2021. E tempo ey, lider actual di PPA, Otmar



Oduber, tabata minister di Infraestructura, Desaroyo Teritorial y Medio Ambiente representando partido POR den Gabinete Wever-Croes I.

Na februari di 2021 D. a bay traha na DIP, unda na 2023 el a bira director interino di e departamento despues di e suspension di Haime Croes. Sinembargo, el a baha cu zwangerschapsverlof, lagando Robert Maduro como director interino. D. tabata programa pa reanuda su funcion pronto, pero awo cu e ta involucra den caso Moringa, e no lo por reanuda su cargo.

Instabilidad den DIP
Lectornan di Bon Dia Aruba por recorda cu na mei 2023, gobierno di Aruba a confirma e suspension di director di DIP, Haime Croes. Esaki tabata relaciona cu un investiga-


cion interno y administrativo, despues cu Ministerio Publico a stop e investigacion penal cu tabatin den e departamento, bao nomber Kukwisa.

Mientras tanto, Croes tin ya mas cu un aña suspendi, y tin un caso entama contra prome minister Wever-Croes y Gobierno di Aruba pa keda reinstitui den su posicion como director di DIP. E investigacion, di cual te ainda no tin un conclusion, ta uno disciplinario checuta pa Departamento di Recurso Humano, y lo ta basa riba e acusacionnan den caso Kukwisa, entre otro asunto interno.

Sinembargo, cu e investigacion contra D., ta resulta cu e cura ta mesun malo cu e malesa den DIP.

Declaracion di gobierno di Aruba

Despues cu e caso a bira conoci ayera, Gabinete Wever-Croes II a reacciona riba nan cuenta di Facebook dunando splicacion tocante e caso. “Algun siman pasa DIP a constata posibel iregularidadnan durante controlnan interno. A base di esaki hunto cu Departamento di Recurso



Humano (DRH) a haci un investigacion, “feitenonderzoek”. Basa riba e conclusionnan di e investigacion ey, DRH a entrega keho na Landsrecherche.”

Sinembargo, e post no ta indica ki sorto di sospecha a investiga, tampoco kico e precies tabata e conclusionnan di e investigacion pa cual a entrega keho na Landsrecherche, pues no tin hopi detaye ta conoci di e investigacion. “E caso awor ta den man di Ministerio Publico, y mas informacion por wordo duna solamente door di vocero di Ministerio Publico,” nan a indica.


Teniendo cuenta cu minister di Infraestructura, kende actualmente ta prome minister Wever-Croes, lo ta den Parlamento awe pa contesta pregunta tocante supuesto

interferencia den Ministerio Publico, e publicacion di Gabinete Wever-Croes ta tuma e oportunidad pa desmenti cualkier laso cu e caso Moringa.

“E caso aki no ta envolve e Minister di Infraestructura mirando cu e proceso di otorga tereno a wordo depolitisa (Minister no ta firma pa duna tereno) y e Minister no ta parti di e proceso, ni di e investigacion.”

Alabes, e post di gobierno ta confirma cu “e dirigencia di DIP ta sigui den man di Sr. Ir. Robert Maduro, manera tabata e caso den ultimo lunanan,” agregando cu “Gobierno di Aruba ta lamenta e caso aki. Mester bisa si cu e sistema di control interno ta funciona y asina por evita casonan di iregularidad den futuro.”

Aruba rondona pa depresion tropical



Caribbean Weather Center ayera a comparti informacion tocante e depresion tropical 18, ubica den north-west di nos region, cu actualmente ta rondando Aruba.

Comunidad por a nota cu

tin menos biento y hopi nubia. Na nivel local, y principalmente den parti north di Aruba, ta reportando yobida fuerte cu strena. Actividad den sur y west ta acercando nos isla, pero tiki tiki ta perdiendo forsa.

Turista a hoga na Boca Catalina

Awe den oranan di merdia a bira conoci e lamentable noticia di un persona cu a hoga na Boca Catalina. Riba e video cu Bon Dia Aruba a ricibi por observa con personal di emergencia ta purba di reanima e persona cu CPR.

Sinembargo, informacion ricibi despues ta indica cu e esfuersonan no a duna resultado y lamentablemente e persona, kende a keda identifica como un homber Mericano di 84 aña di edad, a fayece.

Bon Dia Aruba ta extende palabra di condolencia na sernan keri di e fayecido.

